

四庫全書

集部

欽定四庫全書

文忠集卷一百四十六

宋 歐陽修 撰

書簡三

與趙康靖公

叔平

至和三年

某啟辱教并高郵二書不勝感刻足以仰見仁人之心  
惻物垂憫之深也方欲專馳人去請時暑重煩揮翰來  
旦併仲面謝人還姑此

又 至和三年七月

某啟累日阻拜見不審尊候何似某為水所滄倉皇中  
搬家來唐書局又為皇城司所逐一家惶惶不知所之  
欲却且還舊居白日屋下夜間上棧子露宿人生之窮  
一至於此人馬隨多少借搬賤累幸不阻

又 嘉祐四年

某頓首啟初夏已熱不審動止何似鄆去京師不為遠  
而叔平在外宜日走訊問候興居而動輒逾時雖云人

事區區實亦可責也某昨衰病屢陳蒙恩許解府事雖  
江西之請未獲素心而疲憊得以少休豈勝感幸卜居  
城南粗亦自便自在府中數月以几按之勞凭損左臂  
積氣留滯疼痛不可忍命醫理之迄今未愈夫府孰不  
為之獨衰病者如此爾東平風物甚佳為政之暇想多  
清趣更冀為朝自重以俟嚴召遞中謹奉此有懇如別  
幅

焦千之秀才久相從篤行之士也昨來科場偶不曾入

其人專心學古不習治生妻子寄食婦家遑遑無所之  
往時聞鄆學可居所資差厚可以託食而焦君以郡守  
貴侯難以屈迹今遇賢主人思欲往託竊計高明必亦  
聞此但恐鄆學難居今已有人爾若見今無人則焦君  
不止自託其於教導必有補益亦資為政之一端也更  
在高明詳擇可否俟有寵報決其去就也謹於遞中布  
此懇

又 同前

某啟久不奉狀乃以今夏暑毒非常歲之比壯者皆苦不堪況早衰多病者可知自盛暑中忽得喘疾在告數十日近方入趨而疾又作動輒伏枕情緒無悰深思外補以遂初心而唐書不久終篇用是更少盤桓侍祠既畢當即決去形容心志皆難勉強矣焦秀才事荷挂念方走淮南欲挈家而其婦翁作省判遂被留連勢不能去然渠感愧非一也某久欲作書屬病今猶居告自叔平兄去後子華作憲遂鮮歡

又 同前

某啟近嘗奉狀秋雨早寒不審尊候何似昨辱書言郡封不安勞慮醫藥數日前聞果不起伏惟哀悼之懷何以堪處無由陳慰徒用瞻仰叔平素喜浮屠之說死生之際固已深達茲顧未能頓至無念諒用此可以少寬哀苦之情爾交游無以為言聊以此塞悲奈何奈何更希為國自重也謹於遞中附此

又 嘉祐五年

某頓首啟伏承榮被制書入司天憲中外欣愜以為肅  
政綱以重朝廷於茲有望焉至於朋舊又喜來歸獨不  
得親款宴言以為恨爾竊計旌旆已及郊畿無由瞻迎  
溽暑惟為國自重

又  
熙寧二年

某再拜自承榮遂挂冠之請日欲馳賀而病悴無堪事  
多稽廢其如不勝欣慕瞻仰之誠也即日隆暑伏惟台  
候動止康福竊惟宴間之樂大愜雅懷回視塵瑣必深



閔歎也某衰病日增尚此遷延為愧不淺然亦不晚必  
能勉追高躅也瞻見未涯惟冀順時加重

又熙寧三年

某衰病退藏人事曠廢理無足怪然亦不承問不勝傾  
馳屢得君貺書及見唱和新篇粗審動靜喜承台候萬  
福嚮嘗辱許枉顧雖日企竚乃出於乘興不敢坐邀然  
又思穎之清決在此春若得自乘一鹿車造門求見亦  
未為晚未間春暖惟冀以時衛重

又 熙寧四年

某啟自退居杜門人事幾絕養成疎慵稍闊拜問塗中  
忽辱書頓慰岑寂兼審經寒尊候萬福某衰病如昨日  
足尤苦殊不少損茲亦老年常態爾閑居之樂無待於  
外而自足處多惟朋舊相從為難得自安道得請南臺  
竊思二公物外得朋之樂不勝羨慕所承寵諭春首命  
駕見訪此自山陰訪戴之後數百年間未有此盛事一  
日公能發於乘興遂振高風使衰病翁因得附託垂名

後世以繼前賢其幸其榮可勝道哉在公勉強而成之  
爾餘具別紙

與馮章靖公

當世 嘉祐三年

某頓首區區久闕致問中間辱書為感何已冬寒伏惟  
台候萬福某以衰病期一作思得一小郡養拙三二年間

謀一歸老之地此願未獲遽被責以吏事精力耗竭何  
止強勉不出歲末春初當有江西之行矣薛親幹敏河  
東風土民間事緒可以詢問得佐幕府甚幸甚幸某為

目病為梗臨紙草率惟冀鎮撫外以時為國自重

又嘉祐四年

某啟自承移鎮合肥嘗一得奉狀其後區區更闕附問  
不審酷暑以來尊候何似廬在淮南為劇郡竊惟下車  
布治之初當少煩條教既而可樂之趣則有多於他邦  
也伏惟視政之暇為時自重佇俟來歸以慰士大夫朋  
友之望

又嘉祐五年

某啟伏自移鎮肥上嘗一奉書忽已踰歲績雖乏馳問  
然瞻企之勤則未嘗懈也即日春寒不審尊候何似某  
以衰病無堪自解秩天府於今一暮正以唐史殘編為  
累今幸成書不久進御遂當南去世事老來益有可厭  
者矣自當世治肥然大率諸相知皆云不得書某亦以  
地僻少有來使得詢動止朝廷公議與交親私望皆願  
還歸未間向暖惟冀為國自重

又  
同前

某啟昨自罷煩劇卜居城南少獲休息然猶此盤桓未  
遂決去正以唐史將遂終篇然亦不過秋末時事爾廬  
去京師不遠計可備聞難於紙筆具道也當世據名藩  
優游文史自足為樂其餘一付公議但朝多賢士而獨  
在外與相知之私立欲公來歸之速爾某衰病俱攻去  
心甚速諸公察其實然而未肯決然放去奈何奈何原  
父雖歸子華作憲朋友益蕭索當世尚壯及時讀書行樂  
此外稍隙時當得數奉問大熱更冀自重

又 同前

某啟自承移鎮金陵遂疎奉問經暑竊惟體履多福江山之勝實足以資清興而賢者久居於外豈朝廷之意哉朋友區區之私又可知也某衰病迫於歸計唐史奏御遽陳危懇而未蒙聽允進無所補退不獲志負愧周行不知所措一作處相見益無涯惟為時自愛以副瞻望

又 同前

某啟自成書請外所陳哀切冀以危誠有以感動而二

三公過為顧慮曲以見留在意實厚於計則非便也奈何奈何本欲為郡下客少溷主人復未可得然使少遷延終當必償夙志也濟叔窮居得當世在鎮必以慰意不久當應稍起此公議久所鬱鬱也前承惠碑多佳者甚濟編錄感幸感幸聞金陵有數廳梁陳碑及蔣山題名甚多境內所有幸為博采以為惠實寡陋之益也病暑草率

又 同前



某啟承惠寄碑刻既博而精多所未見寡陋蒙益而私藏頓富矣中年早衰世好漸薄獨於茲物厥嗜尤篤而俗尚乖殊每患不獲同好凡如所惠僅得二三固已為難而驟獲如是之多宜其如何為喜幸也濟叔公議猶屈乃吾徒之責未嘗少忘於懷而造物者第與衆人同為嗟歎而已豈賢人君子亨否有命殆非人力能致邪雖然敢不竭力辱諭感愧感愧承專遣人至數召問其還期每云有故未歸遂且於郵中附此俟渠行即當奉

狀也

又嘉祐六年

某故衰病碌碌無所稱徒負愧恥區區強顏人事廢曠  
久闕致問但深瞻企昨承進寵經筵而尚留居外未足  
以慰士大夫之望實非交游之私論也辱惠書經暑涉  
秋動履清安江山英勝聊助公餘之興未嚴召間希為  
國自重

與王副樞

景彞

嘉祐五年

某啟自承軒騎歸止屬以多故未克祇謁暄和竊審氣  
體清安適辱簡誨兼示鄭州書信等偶在院中定題不  
時為答深所感愧謹馳此為謝幸加恕察不宣某再拜  
景彞舍人閣下

八日

與王懿敏公

仲儀

嘉祐二年

某啟數日之間併承寄惠解栗雖不得書亦喜尊候萬  
福某居此如魚鳥之池籠歲律忽已適盡衰病日復侵  
攻交游多在外塊然處此情緒可知今日得蔡大書言

久病近方就安人生聚散憂患百端相見何時况開年  
決求南去遂益為胡越也惟以時自重臨紙區區

又  
嘉祐二年

某啟稍不附問新春尚寒不審尊體何似歲月不覺又  
添一歲目日益昏聽日益重其情悰則又可知嚮者公  
解錢事知已息就令不息徒喧噪人耳何足恤也邊州  
無事誠為可樂然俗吏亦不能也近來班著蕭條羣賢  
在外皆當召歸而議者不及衰病思去又亦未得守常

不變其弊乃爾其他時事不能悉具惟過年益區區但  
時與韓三吳大相從爾燈夕却在李端慙家為會諸君  
皆奉思也數數附回州人書皆不親付常意不達今偶  
此人取書適在家湖柑閤寄數十箇去到彼得三四不  
損尚可表意若遂無可入口亦無如之何也不罪不罪  
因人幸時惠問

入  
嘉祐二年

某啟昨日自貢院出得所寄書伏承春暄氣體清福兼

知深樂北土之善為郡處處皆佳况此帥府雄盛邊鄙  
無事固足以優游也某昨被差入省便知不靜緣累舉  
科場極弊既痛革之而上位不主權貴人家與浮薄子  
弟多一作為在京師易為搖動一旦喧然初不能遏然所  
得頗當實材既而稍稍遂定去冬求洪井未得便差主  
文今既喧噪漸息遂復理前請期於必得也中年衰病  
尤甚自出試院痛不能飲人生聚散安能區區於此進  
無所補退又不能自遂荏苒歲月有甚了期其他非筆

墨可述惟為國自重因人時枉問以慰無憊

又嘉祐三年

某啟自承有益都之命必謂來朝當得相見不意遂爾  
西行實增怏怏又聞闕遠却於沿路盤桓深欲奉狀以  
莫知旌旆所止不審即日春寒尊候如何計以仲春至  
鎮在路亦不久留成都風物非老者所宜仲儀雖為同  
甲然心意壯銳諒可為樂難以病夫忖度也諸賢在外  
者為復來歸獨公遠去相見何時某非久於此者然素

志未遂心往形留因指使來辭得附書新春為國自重

又嘉祐二年

某啟自去歲秋冬以來益多病加以目疾復左臂舉動  
不得三劑請洪諸公是物議不敢放去意謂寧俾爾不  
便而無為我累奈何奈何然且告他祇解府事必可得  
不過月十日且得作閒人爾少緩湯火煎熬有無限鄙  
懷不能具述薛婆老亦多病於錦繡無用祇是兒婦輩  
或恐有所要臨時奉煩爾土宜歸日惟好且當正如寬



厚之說也呵呵酒絕喫不得聞仲儀日飲十數杯既健  
羨又不能奉信蜀中碑文雖古碑斷缺僅有字者皆打  
取來如今祇見此等物粗有心爾餘皆不入眼也遞中  
續得來書京師自立春泥雪至今凍屍橫路遂罷放燈  
經節不敢過諸人皆云寂寞恐知恐知疎拙無佳物表  
意不怪不怪

又 同前

某啟昨在府中區區不時奉問理不為怪自罷去益忽

忽度日不能為一事公私俱廢此所以日夢南歸視居  
此如桎梏之思脫也自仲儀到蜀未嘗承問但時見宅  
中子弟問動靜云起居甚安異方下車必煩條教計今  
人情習安粗可以為樂矣因書幸示某昨在府几案之  
勞氣血極滯左臂疼痛強不能舉罷居城南粗得安養  
迄今病目尚未復差厭苦人事實不能支祇候夏秋唐  
書了成褫却梅二遂決南去未間時得奉問夏熱為國自  
重

又 同前

某啟區區多故久不附問不審尊體何似自春中曾一奉狀尋於遞中見答昨見公謹云得仲儀書怪某久無信益亦未嘗得仲儀書也但聞蜀人與自西歸者言善政日新兩川蒙賜聞之竊喜大用之有期也某益多病目昏手顫脚膝行履艱難衆疾並攻唐書已了祇候寫了進本遂決南昌之請自此可圖一作蠶處矣京師事體亦迫促動有嫌忌無復縱適歲暮索然殊鮮歡意惟

希公外多愛因暇時作數字以慰瞻企

又嘉祐五年

某啟久不奉狀亦久不辱書惟見諸賢姪得聞動靜前  
日郵中忽承惠問喜涉夏秋體履休勝深以為慰也某  
自罷府又一歲有餘方得唐書了當遽申前請懇乞江西  
前後累削辭極危苦而二三公若不聞近年眼目尤昏  
又却送在經筵事與心違無一是處未知何日遂得釋  
然一償素志於江湖之上然後歸老汝陰爾昨蒙詔諭

俾請假既以地遠暫歸不能辦事又一請假後難更請  
郡以此不敢但更少盤桓會當有時得歸爾承見問所  
以略道一二終日區區不曾勾當得公私一事人事  
殆廢以此不時作書應不為怪嚮寒為國自重

又  
嘉祐六年

某啟近嘗於遞中拜問辱書承春寒動履佳安兼蒙遠  
惠佳篇衰病之人豈敢萌心至於自顧惟知憂畏而衆  
論實可多懼獨見愛之深至於歌詠感愧感愧數十日

來茫然未知所為答問後遂如此其何以免於罪戾老  
退之心不敢望有所立以希名譽但厚恩當報爾仲儀  
何以見教寶臣雖不久當發其如遠甚計須夏方得到  
闕鄙懷千萬不能具述惟期握手為一笑爾盛作少暇  
當勉強為答次因書略道區區餘寒為國自重

又 同前

某啟自春以來私門多故遂闕致問兼承歸騎已東但  
日冀相見也碌碌於此忽焉半歲思去之心雖切而未

有以發近外處相知多見問以求罷太速不知何以傳  
此豈中外人情已欲其去耶不相見數年人事百變前  
夕清卿之室已與擇之共牢而食士夫聞之莫不竊嘆  
富貴浮名何可久恃至於妻子亦不能保然盛衰之理  
固常如此奚足為之悲也君謨已歸睹然一翁病勢自  
到京來頓減前日與余廣州在弊齋間會坐中相顧歷  
道諫院中語笑但奉思爾衰病索然百事俱懶惟故人  
相見庶幾有少清况爾瞻近匪遐跋履之勞更宜避暑

慎攝

又  
同前

某啟人至辱惠以佳篇宣勝珍誦益見治煩餘暇猶能  
及此弊齋有菊數叢去歲自開便邀諸公比過重陽凡  
作數會今秋無復一賞軒裳外物為累於人細較其得  
失何用區區自仲儀與數公自外歸甚思少奉從容殊  
未有暇今有會亦不放曠可歎可歎值夜且奉此為謝

又  
同前



其啟區區不得數奉言宴可勝瞻勤昨日以疾病發動  
請告家居不知賢郎寵過今日見二公言請許此實仲  
儀俯就秉釣者當以為慚爾然佳郡不遠且少盤桓聊  
為偃息也某衰病漸不能支更見楊樂道長往同甲勾  
落大半矣深思一作瀟處未有去端爾客多偷隙作此  
簡鄙懷欲述者多不覺怛怛

又

同前

其啟近以口齒淹延遂作孽兩頰俱腫飲食言語皆不

能呼呬醫工並來未有纖效聞仲儀有蜀中真山豆根  
乞一二兩病苦加以餓損茶然疲卧不暇及他不罪不  
罪

又嘉祐七年

某啟少別忽已更月秋氣漸清竊惟動履勝常受暑方  
初宜少煩條教吏民既已蒙惠則湖上清曠浩然放懷  
可以遺外世俗區區可憎之態至於憂悲煩惱亦自以  
理遣之某竊位於此不能明辨是非默默苟且負抱愧

恥何可勝言獨於朋友之間常懷區區之願如此而已  
謹奉啟咨問

又  
同前

某啟自別日欲致問而公私多故賢郎訪及得聞動靜  
則云甚安昨日公謹相遇廼云近少違和豈非追感悲  
戚使然耶此事實難遽遣其如無可奈何當推以至理  
不得不少自寬釋也竊計即日悉已平愈如常不勝瞻  
想之誠也某至今猶為風毒所苦情緒蕭然不知名宦

何處為好合宮禮近日益牽忙不勝勉強也其他區區  
臨別亦嘗少道祇得如公西湖之樂一二歲比謀成歸  
計遂為田畝之人矣難信之言不敢為疎者道也相見  
未期但增引領因風枉問以慰勤企

又 治平元年

某啟公私忽忽久闕奉狀益以衰病交攻心力疲耗而  
憂責無涯日苟一日是以百事皆廢於因循然亦久不  
承惠問但屢見賢姪賢郎得聞動靜新歲晴和不審尊

體何似湖園清曠春物嚮榮然尚在過音必未欲會聚  
其如閒適之趣幽靜尤佳每苦紛勞但深傾羨也老年  
相知無幾尺書相問略亦無嫌餘暇何惜數字少慰病  
翁然以自久無書不敢奉怪也嚮暖千萬加愛

又  
同前

某啟久不蒙惠問方積瞻思指使來忽辱書可勝欣慰  
兼審靜鎮安閒放懷取適自非嚮用全福何由及此固  
健羨之久矣某疲病不支憂責無際自匪獲罪譴困廢

不能薄展微効捨是三者未有偷安之計自齒牙浮動  
飲食艱難切於身者惟此一事既已如此其他復何所  
得然則勉強於茲顧何戀也因仲儀有見憫之言乃略  
及此經春潤澤稍足相去不遠必同和暖更希為時自重

與王懿格公

君貺

至和二年

某啟日思奉問別後人事益多端倪但見邸報知己禮  
上秋冷道塗貴眷各安某幸如常昨受命使北初欲辭  
免蓋以目疾畏風寒兼多著綿毳衣服不得其如受勅

之日北人訃音已至由此更不敢辭因改為賀使行期頗緩正在嚴凝與君朞行時無異也家中少人照管且移高橋去薛家稍近然公期管勾往來須及百餘日但得回來耳靜便是幸也呵呵自大旆西行羣議遂息請無過慮也佳時美景臨觴之樂不可涯得失外物可置而勿問其餘達識以道消息故不待言也

又嘉祐元年

某啟急足至辱書伏承履茲新正台候萬福少慰翹企

之素也某尸竊於此思逃罪戾未知其所年齒日增心意日耗歸洛之興何可遏承示許以卜鄰亦一時盛事但須公功業成爾否泰常理亦難稽久豈止友親之願也陽侯嚮和惟冀以時自愛

又嘉祐四年

某啟太祝來得詢動靜甚詳尋又辱惠書承經寒尊候萬福門內諸貴愛康安深浣瞻想居秦久議者皆謂當還不然遷鎮近甸應在朝夕浮議多端惟靜安可以銷



弭修唐史已寫進本然卷帙多須數月方了南去有期  
心欲飛動過年衰病益侵見諭辯欲加收錄此子庸駕  
詎可出明公門下不知何為誤聽但與家人大哈爾徐  
當議未晚賢郎在都下殊乏祇迎悚愧悚愧漸暖為時  
自重因賢郎行謹布區區

又嘉祐五年

某啟近因急足還府略布謝懇即日春寒仰惟鎮撫外  
台候萬福某尚此遷延又見春花益盛第以目病眩晃

不勝飲酒鮮棕爾不審大府花時如何憶曩在彼不甚  
盛也前承問及石研今且致三枚續當更求佳者咫尺  
瞻企惟以時自重

又 嘉祐六年

某以衰病碌碌無稱莫塞咎責徒自為勞區區久不奉  
記屢見家人得書承夫人尊候微有違和兼知來召夏  
醫方欲馳問太祝遽至得聞子細喜已漸安兼見過客  
言花時名園數有家會聞之益用為慰某自過年兒女

多病小女子患目殆今未較日頗憂煎前日太清賞花  
省自入館惟景祐之會以選人獨不與殆今二十五年  
始遇茲盛事是日兼承見寄絕品雖有已凋者然所存  
不勝其麗見之病目開豁勉強飲數酌以當佳惠恐要  
知也見太祝言來擇壻茲事難於倉卒宜精慎也多日  
欲作書適聞有專人立草此其他諸懇俟太祝歸時致  
狀

又  
同前

某頓首近於遽中嘗獻拙句急足遽至承賜手書兼惠  
新筭併增感愧竊審春和體況清福普明寺卅年前亂  
道宜為削去以藏醜拙廼蒙刊著何以堪之春早差遠  
京洛飢民亮煩賑卹計亦不廢行春也某忽忽少脫

真蹟

如此

第未能遂去餘無可言爾薛司勳過府下事有可

詢當得其詳惟以時為朝自重不宣某手啟上留守尚

書學士

清明日

京醞二器聊表意但患人力難致偶薛

君有卒擔之爾

又 同前

某頓首啟自薛司勳行後更闕奉狀見家人得十四姨夫人書竊知近苦牙痛道家修養先於固下不宜有此病然此患中年以後人皆有之患者醫方亦多難得效某數年來頗以為苦用藥多殊未有驗近於張唐公處得一方他言親用有效然亦未曾合今粗錄呈可試用也春旱甚濶遠以貽上心焦勞之慮近躬禱太一遂獲嘉澤河洛間應已霑足民歲當有望不審邇日為政外尊

體何如更希慎攝因附藥方遞中謹此咨問

又同前

某啟謝懇已具如右秋寒台候萬福某衰病忝冒以寵  
為憂自省蹇拙曷嘗敢萌此望人亦曷嘗期此然事出  
意外猶竊叨據君貺材望德業三十餘年一日歸副具  
瞻以快士大夫之願老朽之人當在汝陰田畝與農夫  
野叟相賀人事固常如此所示排擯曾何之恤矧洛政  
善譽初無間言也恐知之以新忝命人事紛紛致謝稽

晚皇恐皇恐

又  
同前

某啟自叨竊非望嘗於郵中致謝懇即日冬候遂爾凝  
寒仰惟動履清福某勉強衰病才薄寵益損必隨之親  
朋見愛何以為教有望有望見家人言十四姨夫人昨  
夕違和喜已平愈公期由此專去省候鄙懷區區因話  
一可詢問凡諸委瑣不復煩言歲晚惻惻惟以時為國  
自重

又 治平元年

某啟嚮自遭國卹公私事緒既多而衰病之年憂哀並  
集餘生朽質殆弗能支顧於人事曠闕交親宜以相寬  
自春不常拜問然昆弟多在京師薛九與二夫人書信  
時時獲聞動止即日秋暑猶盛不審寢味如何朝家方  
恃羣賢共此康濟邊寄雖重難恐淹留未候見聞惟以  
時為國保重

又 治平二年



某啟專人至辱手書承履此春和台候萬福某哀病昨  
然思一藏拙之地未能遂心日夕勉強不勝其勞其餘  
幸恚如常承示諭請覲尚未見奏削安道特地以親為  
辭必留滯旌車然辭官亦當俟報爾適以私家少故牽  
忙作書不周謹惟為朝自重以副區區

又 治平三年

某啟近併捧遞中專人所惠三書竊承經暑台候萬福  
貴春康寧粗慰瞻企諭以請洛之意甚詳自公留滯於

外士大夫之論鬱然而當職者負慚與責久矣今茲所請在理何疑諸公諒不煩丁寧某又可知也有欲知者私門所便備問及爾亦已盡諭但奏削尚未至爾某瘡病茶然昨屢乞懇以經此詆辱於國體非便第顧勢未得遽去以此強顏成何情況事有所激實如來諭其諸多端匪遠可以面叙本末餘當續報惟酷暑為時自愛

與執政


熙寧三年

某再拜啟仲夏炎毒伏惟台候萬福某以官守

一作居守官

外具瞻之地非時不敢通問今迫以懇悃不能自默某  
衰病累年中外具察不待煩言自去冬漸難勉強遂有  
壽陽之請而朝恩未許間以接奉春陽攻注眼目服藥  
過度渴淋復作遂不能走自三月下旬在假亦兩曾奏  
知不期於病告中忽蒙此恩選事出意外莫不驚憂竊  
意朝廷必以居東逾歲別無大過遂以為可委爾其如  
東州祇是尋常一大郡無兵馬無邊事又幸豐熟其如  
老病諸事曠廢處自知極多而過往不察其詳反以廢

職為少事此其可笑者也并晉一路外鄰二敵使某不  
病亦不敢當况疋悴不能策勵已具劄子細陳乞免此  
誤恩敢望台造察其誠實其餘區區常談難信之語更  
不復云惟早賜允俞免再三煩瀆則大造也不宣



文忠集卷一百四十六

# 欽定四庫全書

集部

文忠集卷一百四十七至  
五十

詳校官庶吉士臣范逢恩

檢討臣何思鈞覆勘

總校官降調編修臣倉聖脉

校對官中書臣宋枋遠

謄錄監生臣許溶

欽定四庫全書

文忠集卷一百四十七

宋 歐陽修 撰

書簡四

與余襄公

安道 慶厯元年

某頓首再拜啟為別五六歲未嘗一日不企而南望然  
某攜老幼浮水奔陸風波霧毒周行萬三四十里侍母  
幸無恙其如頑然學不益進道不益加而年齒益長血

氣益衰遂至碌碌隨世而無稱邪安道又不幸丁家艱

窮居極

一有  
處字

起居安否不通於朋友況欲施於他邪嗚

呼天果欲窮吾人乎承不久服除當早治裝以少解積  
歲區區之思廣文曾生文識可駭云嘗學於君子畧能  
道動靜因其行聊書此為問

與王文恪公

樂道

慶歷八年

某啟至節方欲拜狀遽辱惠問感愧感愧新陽納慶奮  
發賢蘊以澤斯民不勝祝願也某近以上熱太盛有見



教云水火未濟當行內視之術行未逾月雙眼注痛如割不惟書字艱難遇物亦不能正視但恐由此遂為廢人所憂者少撰次文字未了爾恃相知敢布深寒保重

又

皇祐初

某頓首啟昨日州吏行嘗奉訊徐君來具道相見甚慰所懷某此幸郡小事稀苟見惡者稍息心此亦安然矣自到此公私未嘗發尺牘惟有書來即答餘外惟自藏於密但時有一二文字此事吾徒斷不得爾進取不可

于大禍患當避自餘愛惡豈能周卹也到此極無事所  
恨漸老益懶情空過日月不曾成頭段著得些文字五  
代史近方求得少許所闕書亦未能了人生多因循已  
十三年矣足下幕中苟有著述無惜寄示李習之文字  
序附上冬冷保重

又嘉祐四年

某啟區區久不附問人至辱書具承動靜康和姑以為  
慰某衰病處此數月不為佳計遇事在目前者遣之以

自免過其他如在郵傳也自期以半歲求解復尋江西  
前請比可得亦須來春矣此外毀譽都不曾問十年不  
曾燈下看一字書自入府來夜夜燈下閱數十紙目疾  
大作一月之內已在告如此安能久於此乎承書果亦  
以此見憂眼稍開得纔兩日猶在告中惜目力又不可  
不自書草率保愛

又  
熙寧元年

某啟自承大旆臨許更闕拜問蓋以衰病無悰人事多

廢恃賴相知不以書信疏散為意爾人至惠教益荷勤  
眷兼審經秋尊候康寧并增感慰氣節嚮寒未召用間  
惟冀為時自愛以副區區

又  
同前

某啟病目艱於書字咫尺闕奉狀蒲支使者過府下云  
得請見顏色尚覺清瘦辱書承手足遂已輕安其慰可  
量公之功在朝廷不淺所蘊未施萬一賴田謾置之為  
他日計亦無害累嘗具此獻說爾某以決計止在來春

亮可奉為徐求也人事日新閒處尚有所聞然益覺靜  
勝爾日夕欲奉狀續當馳啟茲不具悉餘乞慎藥食以  
自輔也

又 同前

某拜啟近急足自府回辱書承此初涼動履清福甚慰  
勤企兼審中間小疾為苦喜已平和仁政清簡歲豐民  
樂亮足順神某衰病難名凡老患或耳或目不過一二  
諸老之疾併在一身所以歸心不得不速也蒙惠藥方

益荷意愛已依方合和也咫尺未涯瞻款惟時自愛

又熙寧三年

某啟某以閒僻養成懶慢久闕拜問專人辱書感慰曷  
已某此幸藏拙極遂優安其如衰病侵淩加以私門煩  
惱無復情懷亮由福過災生致此爾所以量分知止切  
於思歸也咫尺莫奉宴言歲暮隆寒伏冀為時自重

又同前

某年齒日加衰殘日甚理所宜然不足多怪昨者蒙上

哀憐信其實病免并得蔡恩出萬幸兼去潁數程便於歸  
計再尋前請不遠朝夕承樂道亦有卜居許下之意柴  
車藜杖歲時往來此自一段好事古人難遂蓋公素蘊  
未施盛年方壯也若某則實難策勵爾

又熙寧四年

某啟昨蒙上恩閔其衰老許遂退休自杜門里巷人事  
幾廢以是久闕致誠而雅眷不忘惠然垂問誨諭稠重  
以慰寂寞於友情乃見之時以勵俗風義所及其利博

矣非止病夫之荷德也感愧感愧兼審經寒台候萬福  
閒中優幸實多但交親益難會見此為區區歲晚凝冽  
惟宴居願養以需復用

與滕待制子京

慶曆五年

某頓首自夷陵之貶獲見於江寧逮今十年而執事謫  
守湖濱某亦再逐淮上音塵靡接會遇無期則人事之  
多端勞生之自困可為歎息何所勝言急步忽來惠音  
見及伏承求卹民瘼宣布詔條去宿弊以便人興無窮



之長利非獨見哲人明達之量不以進退為心而竊喜  
遠方凋瘵之民獲被愷悌之化示及新堤之作俾之紀

一作記

次其事舊學荒蕪文思衰落既無曩昔少壯之心

氣而有患禍難測之憂虞是以言澁意窘不足盡載君  
子規模闔達之志而無以稱岳人所欲稱揚歌頌之勤  
勉強不能以副來意媿悚媿悚秋序方杪洞庭早寒嚴  
召未間千萬自重

與章伯鎮

慶歷五年

某頓首山郡僻絕不與人通每辱誨問何勝感愧某材  
薄寵過得禍甚輕獲此優安至為天幸伯鎮尚淹江郡  
忽已踰年大亨有時先以小抑亦通否之理然也惟冀  
自愛以副瞻禱

又慶厯六年

某頓首州幹至蒙問以書承此新春福履休裕詩文新  
作金石交奏某處窮僻不接先生長者之論久矣忽然  
得之開發鄙滯况得見其人接其道其樂宜如何哉此

志未諧惟用瞻企保重保重

又 同前

某頓首急足至郡辱誨以書承臨郡之暇寢味休適可  
勝瞻慰也示及傳記三本文偉意嚴記詳語簡而賞罰善  
惡勸戒丁寧述作之功正為此爾欽服欽服某幸閒僻  
甚可尋繹然獨懶於撰述爾嘉話未卜冬冷千萬保重  
偃虹隄記滕侯牽強不意敢煩餘暇特與揮翰荒惡之  
文假飾傳久感愧感愧

又 皇祐元年

某昨以目病為梗求穎自便養慵藏拙深得其宜泛舟  
長淮脩然其樂急足遠至辱書為別且承春暄寢味多  
福相去益遠瞻望徒勞千萬保重

又 同前

某自聞子美之亡使人無復生意友朋淪落殆盡存者  
不老即病不然困於世路愁人愁人就中子美尤甚哀  
哉祭文讀之重增其悲爾盛作俟至西湖方快吟味淮

陽若區區到彼必少祛俗慮尚可勉強以攀作者惠茗  
正為所少之物多荷多荷自病來絕不飲酒尤為無聊  
正藉此物以增清興爾

與王郎中

道損

慶歷八年

某啟向在河朔嘗辱書為誨人事多故未暇復問尋而  
又聞子野之訃值某遷郡淮南扶挈老幼凡再登舟再  
出陸始至敝邑用此亦未暇與友游相弔子野之賢難  
得此天下公議共惜之若相知之難

二字一作與相

得則某私

恨亦有萬萬不窮之意苦事苦事自古賢者無不死惟  
令名不朽則為永存矣凡朋友為子野痛惜者惟可以  
此一事自寬而已范公誌文詳悉而實錄甚善甚善新

歲伊

一作甫

始千萬保重以慰瞻詠

又 嘉祐三年

某啟專人至辱書承經寒為政外福履清康實慰瞻企  
某衰病不支遽蒙以煩冗驅策不敢固辭其實非所能  
亦非所樂又非所堪也居華已逾年當別有美用承見

諭敢不如教某病目十年遽為几案所苦冬至後自當請麾南去矣嚮寒保攝

又 嘉祐五年

某啟辱見諭碑文及拙詩續當遞中奉寄蓋以唐書甫了初謂遂得休息而却送本局寫印本一字之誤遂傳四方以此須自校對其勞苦牽迫甚於書未成時由是未遑及他事以屢失信於長者不避忉忉承首塗有日旦夕當詣謁人還且此不能盡所懷

與杜大夫

慶曆八年

某再拜久不聞問經夏涉秋榮侍外體履多福近為漕  
魏河決淮南例令勸誘人戶進納稍草淮人既貧而道  
遠期促絕無應命者朝旨勸誘使人傳宣又令差定莫  
知所從南京亦必須有指揮不知本府如何擘畫見勸  
到人戶多少如何誘之孰是差定某才薄能劣受恩厚  
甚聞朝廷以河事為急正當竭力補報然苦於事無益  
而為國歛怨於淮人則重為可罪也為遠方不知事體



急走此奉咨或有勸誘之術願乞餘矩稍濟其急忙中  
不予細秋涼保重

又 皇祐四年

某啟閒居之人久不奉問得遞中書承榮侍多福又知  
有悼嬰之戚斯事無可奈何惟當日寬上慰慈顏也臨  
政之始勞慮想多前曾託姚教授奉問實錄蓋自居憂  
日苦閒坐無由度景又近日有一閒人頗能裝栽諒彼  
視事開決却少暇時以此欲於閒中銷日也不訝不訝

及聞近有悲戚則猶不可以閒事干聒深悔前言之容  
易也悚惕悚惕方欲奉疏偶姚教授介來聊述此冬深  
保重

與張職方

皇祐二年

某啟相聚逾年別來豈勝思戀道塗無阻行已及陳時  
時得雨舟中不熱自過界溝地土卑薄桑柘蕭條始知  
賴真樂土益令人眷眷爾小兒輩望見萬壽塔尚指以  
為臺頭聞其語不覺愴然爾過陳恐難附書秋暑多愛

又 皇祐三年

某啟自承遷秩嘗辱惠書迫以多故尋疎奉問近得康

一作唐  
下同

屯田信方知已授蘄春旦居潁上即日寒凜寢

味多福某自至此以親疾厭厭無暇外事欲求一僻地  
以便侍養而遠處不可迎侍側近又多為清要所居不  
敢陳乞區區於此無復情悰非復湖上之時也未涯相  
見千萬自重因康屯田人回附此相次專馳狀也

又 皇祐六年

某啟久不聞問人至得書為慰不已六月一日從吉得  
郡必南正值大熱應須秋初方可離潁簞真病與懶者  
所宜珍荷珍荷丁太博却有書一封幸為致達斯人文  
章君子不幸遭此在憂患中難得信問往來早為達一作  
送之已縣境有好碑試為訪之別後所收必多也閒中  
無物為信慚悚慚悚

與劉學士

湜字子正

皇祐四年

某叩頭言罪逆餘生護喪假道乃勞台旆枉顧孤窮感

愧之誠何以云諭限茲凶斬無由詣見斯又重以為恨也乍遠為邦自重謹附手疏叙謝

又  
同前

某啟哀苦中幸得相見辱眷甚厚行計所迫不勝依戀嗣沐手誨併深感乍乍遠珍重行次草草為謝

與知縣寺丞

皇祐五年

某啟自相別後至王回秀才來始一得所惠書承居京師無恙某哀苦如昨近擇得葬地在潁西四十里土厚

水深略依山水向背其餘陰陽家說皆莫能一一如法也卜用今秋恐知恐知示及杜漳州有事令人感涕不已與之同甲內顧身世可為漂漂此人有材能而氣儻宜其與監司違戾然怒者祇能言其率意行事是保無他過矣某閑居無人又不知其所止無處附書信恐知其家屬所居因信切言及千萬千萬徐謝高科今必已決俟見春榜附書也因見伸意某以妻母病家人兒子輩入京相看因得附此不悉已暄多愛不次某再拜

與臨池院主

皇祐五年

某啟小姪人還曾附問邇來暑毒安和某今謀奉太君  
神樞南歸將遂相見因小姪先行奉此不次某書白

月十六日

小師等各安建茶二角表信

與吳給事

名中復 皇祐末

某啟罪逆餘生遠屏郊外特承顧訪感咽何勝仍沐寵  
惠雄編俾遂榮覽雖在哀迷亦知開譬如嘉州涪井之  
作有以見仁言之利博而非文字之空言也欽孰

一作  
仰

材譽固已有日粗窺高蘊益用歎服限以衣制不能謁  
謝聊叙此不次某再拜仲庶太博執事 二月二十八日

又 嘉祐三年

某啟思奉清論不可得徒用企想夏熱承體氣佳裕某  
此者忽有君命殊出意外不惟才非所長加以他慮不  
淺昨已懇辭庶可得免如其不獲恐難堅避辱命誌丈  
鄙拙豈足當之第以欣慕忠義樂於紀次因得附名於  
石末遂不敢辭爾惶悚惶悚鄙懷區區不能具道某頓



首諫院舍人執事

又  
同前

某啟新令雖許往還尚以職事牽冗未皇祇謁計寒凜  
體氣清康前承要墓碣久稽應命近因病目在告始得  
牽強衰朽無意思僅能成文不足以發揚令德慙恐慙  
恐昏眩不能多書謹此

與李留後公

謹

至和元年

某啟昨自居潁服除久俟外補既而召見尋乞蒲同出

處倉皇諒聞於外也前日入拜恩旨復留孤生多難鬢  
髮蕭然心形兩衰豈有榮進之望但區區未能即去爾  
承坐鎮餘閒甚有清趣然想非久外留當被嚴召老朽  
或未出都尚得一相見則為幸矣瞻仰瞻仰

又  
嘉祐二年

某啟嚮以僑寄僧坊公私多故忽忽為別豈勝馳情使  
至惠書竊承下車經寒動履清福粗慰瞻仰某一守經  
愚懦爾豈堪適時之用加以衰病勉強實難過裡慶得

遂一麾為幸矣公謹為郡誠可樂然賢者遠外於今之時勢必難久目疾得靜安息慮當益清明某昏花日甚書字如隔雲霧亦冀一閒處將養爾深寒惟望為時自重

又

同前

某啟自旌旆之南數於他書中承見問中間寄惠八功德水又辱手書及今者人至又辱書感慰何已兼審經寒為政外體履清康某自過年如陡一作頓添十數歲人

但覺心意衰耗世味都無可樂百事強勉而已請外決  
在今春惟不知相見何時爾鄙懷千萬莫能具述惟以  
時為國自愛瞻仰瞻仰

又嘉祐三年

某再拜近因人還嘗得附狀茲者寄水人至又辱書審  
春寒體况清康兼惠清泉亟飲甚甘實如不疑所品物  
固有處於幽晦而發於賢哲者茲鄙夫欣慕樂於紀述  
也適值館伴契丹人使旦夕到闕頗區區須事畢當馳

上也人還謹奉此

又  
同前

某啟自春氣候不常伏惟攝理清康前承惠浮槎山水  
俾之作記又於遞中辱書久不為報蓋牽強拙記未成  
爾某中年多病文思衰落所記非工殊不堪應命文辭  
已如此不欲更自繆書亮不為罪然得子履一揮尤幸  
蓋不敢煩公謹真翰也皇恐皇恐

又  
同前

某頓首急足至辱書

一有惠字

承此初暑尊候萬福浮槎拙

記託賢弟附去多日疑其未至間此急足發來也初深  
欲自書屢試書數本皆自嫌不過意遂已前書具道必  
可亮也向時竊見議科場奏甚佳然欲必行其言尤難  
也論外計刻剝此非守道守官君子孰肯奮然發憤前  
穎人已受此賜矣若使常人用心皆如君子生民豈有  
弊病天下豈有不治哉鄆州還闕方一相見京師久雨  
近方晴乾不審江淮如何向熱以時自重人還謹此不

宣某再拜

又 同前

某啟自附浮槎拙記去後捧遞中所惠書尋以修報茲  
者人至又辱賜教某昨承恩俾侍經席輒以近歲負多  
濫選官以人輕遂至學士例為兼職用此為說得以懇  
辭聖恩矜察特許寢停甚幸也承示啟更不修答也感  
愧感愧某苦風眩甚劇若遂不止當成大疾作書未竟  
已數眩轉屢停筆瞑目鄙懷區區不可盡惟為國慎夏

自重

又同前

某啟承誨示至於勤勤所寄浮槎水味尤佳然豈減惠山之品久居京師絕難得佳山水頓食此如飲甘醴所患遠難多致不得厭飫爾此山前世粗有名然皆因僧居以為勝今所記者特水爾故不及其他也張又新水記與陸羽不同考於二家之書可見矣今更錄往時所作大明井記奉呈庶可知其詳也因人入都小餅時為



致一兩器千里致水恐涉好奇之弊然若不勞煩則亦無害更裁之

與向觀察

嘉祐五年

某啟中間辱書承經暑德履清佳深浣遐想足下留遊河朔忽已數年保塞邊要朝廷寄任之重行第嘉績別膺峻用某衰病無堪待罪西府深愧碌碌秋涼珍愛

又至和元年冬

某啟伏自使旆之西及此兩辱書承祁寒為政外體履

清福深慰企渴某居此區區近又領三班坐曹牽冗久  
闕拜狀仍思舊同局言笑之樂不可復得也請外開春  
決可去未知款奉何日新正以時自愛

文忠集卷一百四十七

欽定四庫全書

文忠集卷一百四十八

宋 歐陽修 撰

書簡五

與劉侍讀

原父 嘉祐二年

某啟專介辱書承此嚴寒為政外尊體休裕實慰企想  
某以衰病當此煩冗已三請江西要在正初必可得艤  
舟亭次寓目平山奉賢主人清論豈不豁然哉伏冀為

時自愛

又嘉祐四年

某啟愚家所藏集古錄嘗得故許子春為余言集聚多且久無不散亡此物理也不若舉取其要著為一書謂可傳久余深以其言為然昨在汝陰居閒遂為集古錄目方得八九十篇不徒如許之說又因得與史傳相參驗證見史家闕失甚多其後來京師遂不復作適因尋檢少書籍發篋得其故本謹以奉呈庶知所謂黑鬼者

雖老鈍之人媚着然亦不為無益也家無他本章看畢  
見付某再拜

又

某啟區區久踈謁奉辱誨承示千文甚佳多感多感或  
云此是李靖字唐人集為千文不知如何也

又 嘉祐二年

某啟前承示以蜀素俾寫孝經一章書之墨不能染尋  
將家所有者試之亦然遽命工匠治之終不堪用豈其

未得其法耶幸令善工精治之使受墨可書當為汙以惡書也糾察題名不罪以閒事聒耳皇恐皇恐

又

此帖綿吉本誤作與蘇子容

某啟暖甚果復作陰嘉節豈遂為雨耶建寧物論益喧當制之人必被收理後日之遊且不欲往幸為致意人事之難乃爾烏絲欄依前書不染墨今納還當以澄心紙試書一章塞命也金櫻煎謹送却乞真牛膝一二束為聖俞處所得不多爾

又

此帖綿吉本誤作與蘇子容

某啟時色可愛不廢佳節之會謂當得同一笑而原父  
獨不往人事難得如意固常如此邪得介甫新詩數十  
篇皆奇絕喜此道不寂寞以相告詩軸俟看了馳上適  
因悶睡起奉答不謹

又

此帖綿吉本誤作與蘇子容

某啟時日辱寵和惡詩豈勝感服屬上馬赴西園不時  
為答前偶拜聞家居未必不佳此語復何所疑蓋為泥

寧中遠赴官會未必若家居清淨然而郊外少車馬雖  
雨無泥甚不為勞而物色晴妍深可愛雖病夫亦動念  
又思家居未必佳也昨日頗歡飲酒差多今日病適方  
睡起謹此咨報

又

嘉祐四年

某啟昨日奉見後遂之北李園池見木陰葱翠節物已  
移而原父獨不在但終席奉思加以風沙益可憎爾輒  
此奉報前承要介甫詩謹以咨呈其一二篇不當傳者



特為剪去之矣恐知

又

同前

某啟數日不奉見餘暑頗甚伏惟起居佳勝昨日羣牧  
特會以熱中飲冷過多偶為腹疾兼以少幹故遂且在  
告祇三兩日當即出參特煩問念感愧曷已乾燥非常  
何時可飲未嘗如此寥落也人還謹啟為謝

又

同前

某啟承出城勞頓晚來喜佳裕拙疾特辱問念感愧曷

已自夜來益注洩今旦蕭然遂召張康診云熱中傷冷  
當和陰陽偏用熱藥所以難效遂以黃連乾薑之類為  
散服之近午差定亦戲家人云近日人脆事須過防昨  
日得聖俞簡云小小傷冷然用徐青乃俚巷庸工爾此  
公多艱滯更當慎攝今須馳問之也精神稍復承見問  
不覺書多聊代面話

又

同前

某啟特辱問念感愧曷已某腹疾猶未平衰年已覺難

支以不敢常食遂且在告熱藥不敢多服惟晨起一服  
爾蓋自家常服者已頑無效冀新功爾承教當節之也  
亦聞梅二不安方欲致問

又 嘉祐五年

某啟辱問以嬰兒未安勞神然當更審慎藥食有張萬  
回太保者其術又精第難呼爾不憚慙勤名之也某今  
日不入正為凌晨稍涼為江氏作誌幸語其家勿相煎  
茲事安敢奉誤旦夕當得以方牽強不能悉

又 同前

某啟承見諭某為之翰家遣僕坐門下要誌銘所以兩日不能至局大熱如此又家中小兒女多不安更為人家驅逼作文字何時免此老業東齋雖狹若心無事可以坐致清涼健羨華事十六日定力當奉見併得叙盡所聞也人還謹此

又 嘉祐四年

某啟煬然炎燎中方不知所以逃生忽辱寵示佳作強

起疾讀其為清快難以言傳然賦無屬和之理但當卧  
誦以代飲水咀雪爾某兩日為伯庸趑了誌文蓋其葬  
日實近恐悞他事然其為苦不可勝言間思宜為劉又  
所誚然自此當絕筆雖不能如俚俗斷指刺環邀於鬼  
神以自誓然當痛自懲艾茲時之勞也方執筆得少風  
稍清故能怵怵不宣某再拜

又  
嘉祐五年

某啟適歸自外捧惠佳篇豈勝欣感偶然之會雖草率

而縛於文字遂為他時故事茲敢不勉也然西齋素患寂寞近方稍葺而原父去此稍遠此俗所謂事無恰好也

又

某啟自原甫既西雖不為官制所拘朋遊亦自寂寞況遂當憂責履畏塗其為情況可知偶思春物將動故都多佳致為樂豈復可涯汨沒聲利惟溺惑者不勝其勞而但見其樂粗有識知魚以衰病此事難為他人道獨

不知原甫諒之否因風幸數垂問以慰瞻企

又嘉祐六年

某啟自春首以來兒女輩疾病日益憂煎自顧無補於時而衰病日增咎責四至其何以堪之惟思春物爛然故都遺勝不可勝覽而公專有之猶恐厭飫所見不以難得為惜也須知有不可得之者也賢弟亦稀相見蓋難得盡從容之適爾公自至鎮一嘗辱問遂絕惠音不知何嫵遽爾見踈也西齋塵土無復人迹偶因連日假

故試尋筆研略布此誠以此亦可見其為貺

真蹟用此貺字

也

其他俗事可憎不復多道但布瞻企之勤爾氣候猶未和暢不知西路如何惟為國自愛某祇拜 初望西物甚衆今寸紙一字不可得況南山竹萌之類耶至於新詩醉墨並棄前約無乃太甚乎

又

與前帖相類疑是  
索本今兩存之

某啟自春以來苦兒女輩疾病憂煎百端遂闕馳問然亦怪久不承惠音不審何嫌遽見斤外始望西州之物



甚衆今一言寸紙猶不可得況於其他乎某老拙無堪  
自顧恐終無所為以補萬一而衰病日增咎責四至其  
將奈何春物爛發故都遺蹟不可勝覽但恐厭飲朝夕  
不以難得為可惜須知有羨而不可得者爾賢弟亦稀  
相見蓋不能得如往日與諸賢忘形取適爾西齋塵土  
無復人迹幸連日假故略得少布區區然公方享清閒  
之樂不宜無暇於故人也其他俗事薄惡可不挂耳惟  
向暖多愛以慰傾企

關

得子華書言西去當於陝雍留

連果能如此否手指拘攣又添左手兩目僅辨物其餘可知

又 同前

某頓首啟近寬卹王職方行嘗得附狀然亦久不承惠問春候猶寒不審動履何似但深瞻詠前日崇政賜進士第見賢郎在高等伏惟喜慰某已衰病三四小子未有能獲薦于有司者見之尤所羨慕賢郎程文甚工為都人傳誦及第等雖高而人猶以為未稱然少年微抑

於此未必不為遠大之本也謹專致此為賀不宜某再

拜原父安撫侍讀閣下

三月十一日

又

同前

某啟久不奉狀蓋欲俟賢郎歸而賢郎未歸遂以稽緩  
然亦未嘗辱書不審經暑動履何如但西州人士之來  
者日載政聲盈於都下使嫉善之言不勝公議聊俾下  
文快釋其餘存之遠大竊計高明必不校闕於屑屑也  
餘復何言盛熱為時自重謹因賢郎歸奉此咨問不宣

某再拜

六月廿一日謹狀

又 同前

某區區於此忽復半歲思有所為則方以妄作紛紜為戒循安常理又顧碌碌可羞不知何以教之哀其不逮實有望於公為多也至於常檢拘攣野率之性尤以為苦然勢難輕動甫及年歲得去為幸也蔡君謨自南歸皤然一叟相見惟互相驚歎而已西齋自去冬逮今遂不復啟其他可知也故都多登臨之勝新詩醉墨時以

為患以忘俗惡之態於理似未為害不知何避而何嫌  
鄙懷千萬居常思欲鉅細布之臨紙則復茫然惟慎夏  
愛護

又

同前

某承見教以用快大過此誠中其病然平日所常患眾  
君子多以為言者也若任責至重未知所為此有望於  
公者初未蒙賜也至於簡事為實為政之大要此西人  
所以蒙惠也若曰外名迹自古聖賢所難莊生之名卓

然見於後世若使無迹後世學者何從而師法之蓋莊  
生之名以彼周孔之名以此皆不能出名迹之外者第  
不當汲汲以求之爾不相見久聊此當握手一笑不罪  
不罪前日餞聖從與景仁介甫清坐終日奉思之外惟  
以鮮歡相顧屢歎而已恐知其近況故輒及之公來歸  
未期惟時得數字猶足以為慰豈以無事為煩邪

又  
同前

某啟薛金部自西來辱惠以書承經寒體履清安兼得

詳問動止併以為慰今歲京師寒甚哀病之軀尤所不堪承諭閒閤無為豈亦苦於寒耶春物將動竊思登臨之樂何有窮涯因人時枉問宜道一二偶薛人還聊奉此不宣某再拜

十一月二十日

又嘉祐七年

某啟春氣暄和伏惟鎮撫之餘履況清適某以哀殘勉強有勞無益公職曠廢私事不修不獨於書記為闕也緬懷故都風物之佳當此陽春暢發之盛臨觴覽勝宜

不為厭蓋以賢人在外公議難安一日來歸遂不復得  
爾此外惟以時為國自愛謹奉狀不宣某手狀上

二月

十二日

又 同前

某啟自過年便欲奉狀只俟薛司勳歸薛既以事滯留  
遂成稽殆但時見賢弟詢問動靜以慰懷爾薛君留此  
屢相見粗悉疲病區區所為及其耳目所得歸必能具  
道更不煩言惟的便無佳物表信蓋西州所闕惟南味



得春多壞不堪寄遠當俟新茶馳獻爾春早極闊知陝  
西尤甚奈何奈何保重保重某頓首

又  
同前

某啟賈常行嘗附狀辱書承經暑動履康和兼蒙惠以  
韓城鼎銘及漢博山槃記二者實為奇物某集錄前古  
遺文往往得人之難得自三代以來莫不皆有然獨無  
前漢字每以為恨今遽獲斯銘遂大償其素願其為感  
幸自宜如何屬患膝瘡家居絕客無人為識古文故第

於郵中粗報已受二銘之賜篆畫當徐訪博識尋繹續得附致其餘區區萬不述一大熱慎護以副瞻勤清水安能久滯耶實負愧也

又

同前

某啟昨賢弟行嘗奉狀屬合宮大禮前後事叢遽闕致問昨日進奏院送九月十五日所寄書竊承動履清勝兼復惠以古器銘文發書驚喜失聲羣兒曹走問廼翁夜獲何物其喜若斯信吾二人好惡之異如此安得不

為世俗所憎邪其窮達有命爾求合世人以取悅則難矣自公之西集古屢獲異文并來書集入錄中以為子孫之藏也幸甚幸甚歲律漸寒惟為時自重

又  
同前

某啟近嘗兩奉狀專人至辱書竊審經寒體履安和兼沐寄惠蘇梨新笋豈勝珍荷自去冬以來親舊私信一皆謝絕獨思公有所惠理可無嫌又聞近申貢餘之禁則應少費宅庫如此屢寄益無疑也節中人事紛紛使

還為謝不謹不宣某再拜原甫經略侍讀執事

十一月

一日

與蔡忠惠公

君謨

某啟辱惠櫻寧翁墨多荷多荷佳物誠為難得然比他人尚少其二幽齋隙寂時點弄筆硯殊賴於斯雖多無厭也煩聒計不為嫌矣諸留面叙

又 嘉祐八年八月

某啟前夕承惠紅絲硯誠發墨若謂勝端石則恐過論

然其製作甚精真為几格間佳物也昨日以有文書不敢致簡為謝李敷還又承惠水清泉香餅數十枚聊報厚貺吾儕日以此等物為事更老應當澹死租庸遂更作一程無由頻面聊當一笑歐陽修頓首白三司給事  
廿九日謹狀

又 治平二年二月

某啟遂爾大暄不審氣體何似承已對謝應已漸治裝無由詣前日劇瞻企荔枝圖已令崔慤傳寫自是一段

佳事碑文好者前已倒篋今又於東退中得此數十本  
勒李敷送上因出過門為韋不宣某頓首君謨端明侍

郎 二十六日

與范忠文公

景仁

治平四年

某啟專人辱書伏承春暄體候清福某蒙恩許解重任  
得毫便私其為優幸不可勝述其他誼誼中外所聞大  
略祇如此故不待煩言惟繫舟府下一見主人而過粗  
釋瞻思之懇為足矣人還姑此布謝

與常待制

夷甫

嘉祐治平間

某啟相別之久書問雖闕而思慕盛德未嘗少忘于心  
不審即日體候何似向蒙寵示盛文一編究味意趣  
殊發蒙陋珍玩秘藏未曾暫釋續更有新作苟賜不鄙  
無外開示至幸至幸深冬為道自愛

又

某相別累年書問雖闕而思慕盛德未嘗一日而忘于心  
不審即日體履何似某碌碌於此國恩未報而哀病

日侵進無少補於時退未得幅巾閭巷以從有道君子  
豈勝區區深寒為道外自愛因小姪行附此

又

某前日承枉顧少接餘論殊不從容朝夕人事稍間當  
獲款奉未間略布區區茶少許聊助待賓輕浼皇恐

又  
同前

某啟嚮在賴區區僅得一二聞餘論雖未厭于心而仁  
人之言獲益已多矣自藏拙于此習成懶慢遂踈奉問



亮須幅巾閤巷杖屨往還始償夙素傾嚮之心爾未間  
以時為道自重因負衆人行謹奉手狀

又 熙寧元年

某啟少便久踈致問經寒仰惟德履多福某衰病如昨  
已再請壽陽旦夕有命西歸漸謀休息必得幅巾衡巷  
以從長者之遊償其素願然後已也未間惟為道自愛

又 同前

某啟到官忽忽已復窮冬老病踈慵闕於致問雪後清

洵體況想佳某幸居僻事簡足以養拙歸心雖切尚少  
盤桓款悟未期深寒加愛

又  
熙寧二年

某啟近小史許充行奉狀粗布區區窮臘陰雪忽復新  
春竊惟養道燕居動履清福某此忽忽已數月開春遂  
尋前請竊謂理盡而無嫌至於幅巾閭巷以從先生長  
者之遊此實無窮難得之樂爾未間保重以副瞻勤因  
家兵還謹奉啟

又 同前

某啟守官東州僻在海溪久踈致問徒積傾馳氣候已  
寒不審燕居動履何如某勉強衰病遷延榮祿又將及  
暮歲物豐盛盜訟稀簡粗足偷安冬春之交得遂西首  
獲親長者之遊不勝至樂未間為道愛重

又 熙寧三年

某啟多病踈懶稍闕致問近兒子自潁還云嘗侍杖屨  
喜承經暑寢興萬福魚審尚以足疾未副召命朝廷禮

賢之意甚篤而士大夫延首之望益勤然君子出處有道足以鎮止奔競敦厚時俗其功利亦多矣某尚未得請未遂相從閭巷之間然亦不過一兩月之頃爾時暑為道愛重

又

同前

某啟霜氣清冷不審燕居動履何似竊承朝旨尚復敦迫出處之際遂為世法必有以果於自信者某累牘懇至而上恩未俞素願雖稽終當如志瞻仰盛德惟日增

勞嚮寒珍重

與沈待制

邈字子山

慶厯三年

某啟素日不奉問苦暑非常歲之比少壯者自不能當  
衰病之人不問可知焉辱教承體氣清安甚慰俗以立  
秋日卜秋暑多少據今日之勢猶當更猖狂爾然世言  
春寒秋熟老健為此三者終是不久長之物也介甫詩  
甚佳和韻尤精看了却希示下

又

慶厯四年

某頓首啟自承拜命欣喜無量而不時馳問者誠以奔走事下吏承叢委遲鈍不能迎解非敢有懈幸諒幸諒知二十四日出京計日必已受事某自保塞面及中山已三日猶須并一作併旬方得拜見他悉面賦也冬寒千萬保育

與王龍圖

益柔字勝之 嘉祐元年

某啟中間辱書承冬凜外體氣清康深慰瞻渴益州張侍郎不久當至哀病區區猶須更旬浹始遂休息因欲

請補江西爾前蒙示諭京東事備悉早出暮歸臨紙忙  
迫無暇及他惟新陽自愛前削殊不聞有議論奈何奈  
何

又嘉祐閏年

某啟急足至辱書承此初暑體氣清和差慰瞻想所云  
少朋儔宴處為樂此乃在處皆然何獨濟也京師固多  
相識然人事區區病患憂煎亦無暇於從容料得常態  
祇如此也求移能少安之為善會要深欲續送上為付

一書吏裝褫遂取不得京師吏人頑慢不言可知勿怪  
勿怪為兒子久病羸弱非常人還且此為謝

又  
嘉祐二年

某啟專介辱書承涉夏秋體氣清適暑雨為孽古所未  
聞救災卹患事匪一端某言不足為人信才不足為時  
用徒耗廩祿每自咄嗟而已承見諭實當今之實患也  
其如言之不見信何他非相見莫盡所懷稍寒惟當以  
時保嗇



又嘉祐二年

某啟人至辱書承尚留究寒凝喜體況清佳杜公清節  
篤行每恨文字不稱不意勝之見愛如此近亦有一二  
家作誌裴少監家當自寄去明復當歸葬於故里亦可  
就得之原叔誌續當錄去會要為此中書吏稽遲又且  
送五冊去不憚頻來取也新詩因人乞數篇亂道亦當  
錄呈深寒公外加愛人還草草

又嘉祐五年

某再拜昨日已入省且喜尊候勝常脚瘡遂愈此正是  
治內之時亦猶寇賊過後講修武備雖非先見亦所以  
禦後來之患也吾儕相戒言難取信蓋各自須有少病  
痛爾呵呵然非此無以獻忠幸深思也無由相見聊奉  
此咨問大熱遂如此哀病不能支入夏便患口齒昨日  
食數大杏今日腮頰腫痛針刺出血不能常食若此是  
將奈何奈何

又嘉祐八年

某啟前日辱訪別但多愧荷以昭陵虞主未還在禮不當飲酒無由會話少時益以為恨承已登舟節氣遂爾寒凝惟希加愛為禱集古錄序鄙文無足采第君謨筆法精妙近時石刻罕有也薄酒四器聊助待賓不罪輕洩皇恐皇恐

又 治平二年

某啟公私忽忽久闕致誠辱書感慰兼審經寒動履清勝京東物俗比二浙殊絕必稍為便然久淹於外此在

位者之責而朋友蔽善之罪其何敢逃某竊位於此已  
六七年白首碌碌初無補報而罪責無量謗咎獨歸自  
春首已來得淋渴疾癰瘡昏耗僅不自支他人視之若  
不堪處況以殘骸勉強情緒可知久不通問因書輒敢  
自道勝之知我必見哀憐深寒事外惟冀以時自愛

又

某啟辱示二詩誦讀數四意趣深遠所謂朋友講習之  
益正當佩服何謂迂耶然謂賢而能書為不幸又似過

之正宜謂不幸與工同其垂名可也因所示乃知平日  
論議猶有形迹愚拙所短固多幸當賜教可也苟有未  
然却當相難正如此然後為友益矣姑話及此不罪忤  
忤

又 熙寧四年

某承見諭詩義晚年迫以多病不能精意苟欲成其素  
志僅且了却頗多疎謬若得一經商榷何幸如之閒居  
少人力俟錄一二拜呈但慮方居禁職無暇及此也某

目足為苦秋深尤劇尚賴休閒足以安養餘生之幸

與宋龍圖

敏求字次道

某啟漸暄竊承體履安和旬休日略邀枉顧家食冀接清話少時必不以容易見罪悚悚

又

某啟伏承遽有子婦之戚莫遑奉慰豈勝馳情暑鬱方熾更冀為國自重少節悲悼區區瞻祝謹奉手啟咨問

又

某啟多日不奉見秋冷竊承體氣佳裕嘗託裴如晦致  
懇欲告借少書籍承不為難今先欲借九國史或逐時  
得三兩國亦善庶不久滯也先假通錄謹先歸納煩聒  
豈勝惶悚

與梅龍圖

摯字公儀

嘉祐二年

某啟累日瞻渴不審尊體何似唱和詩編次得成三卷  
共一百七十三首亦有三兩首不齊整者且刪去其存  
者皆子細看來衆作極精可以傳也盛哉盛哉然其中

亦有一時乘興之作或未盡善處各白諸公修換也內  
刑部竹詩欲告公儀更修改令簡少為幸緣五篇各不  
長故也拙序續呈乞改抹來日拜見

與石舍人

楊休字昌言

某頓首啟自到公私冗迫未得一詣門宇乃辱雅意先  
以顧臨猶未克叙謝其為感愧何以勝顏手翰見貽副  
之古刻無限珍佩人還遽此餘當面盡

與祖龍學

無擇字擇之 嘉祐四年



某啟自擇之使還未嘗一得款奉書局之會幸出偶爾  
遂成鄙句庶邀坐客同賦雖老拙非工而諸君盛作亦  
聊紀一時之事謹以附遞致誠當擇之西行猶在齋禁  
不得瞻違實深為恨暑熱道路不審尊候如何惟冀以  
時自愛

與沈內翰

某啟辱書承祁寒動履清休少慰瞻企餘杭德政民俗  
方期歸厚而遽此嚴召然去思遺惠亦足以在人亮須

春水方可還朝會見尚遙更冀為時珍畲

答李內翰

疑

某惶恐頓首再拜啟孟冬漸寒伏惟尊候動止萬福進  
奏院遞角今日到州伏蒙十八日所賜手書審奉聖恩  
暫臨近服雖朝廷重違勤請不得已而驟闕左右資訪  
之助其如凋敝之俗為幸何多某以門下生為幕中吏  
私願以釋不勝榮輝惟慮車馬未飾已被堅留暫此郡  
齋即膺召命使下吏愚民徒有企躍依託之心而不得

終蒙大惠爾伏承涓日有期限以職守

一無此十七字

不獲躬

詣界首候迎卑情瞻望急切之至

文忠集卷一百四十八